

5. maj 2014

UPA 2014/103  
Anders Olsen

**Pisortat inissiaataannik attartortut inissiat pitsaassusaat aallaavigalugu, immikkoortortaqarfiit aningaasaqarnerannut ajorseriaataanngitsumik, attartornermut akiliuteqartalersinnaanerannut periarfissat misissoqullugit kiisalu misissuinermi ilanngulugu attartornermut akiliutit attartortullu akiliisinnaassusaat eqqarsaatigalugit ineqarnermut tappiissutit naapertuunnersut misissoqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

**(Inatsisartunut ilaasortaq Kristian Jeremiassen, Siumut)**

Siumup tunngaviusumik anguniagaraa kikkulluunniit ineqarnermut akitigut nammasinnaasaminnik akiliuteqartinneqarnissaat, taamaattumillu Siumumi siunnersuuteqartoq isumaqatigaarput pissakinnerusut ineqarnermut akiliutit tungaasigut ullumikkornit pitsaannerusumik periarfissaqartariaqartut. Taamatuttaaq nunatsinni innuttaasut tamarmik pitsaasumik, akilernerqarsinnaasumik peqqinnartumillu ineqarnissaat anguniartuassallugu pissusissamisoorutut Siumumiit isigaarput.

Siumumi isumaqarpugut ineqarnermut akiliuteqartitsineq nammanneqarsinnaasumik aaq-qissuusivigineqassappat Inissianik attartortitsisarneq pillugu Inatsisartut peqqussutaat nr. 12 12. maj 2005-imeersoq naleqquttumik aaq-qissuusinermit qanoq periarfissanik pitsanngorsaanissamut qulaajaaffigineqartariaqartoq. Tamannali annertunerusumik misissuisoqarnissaannik pisariaqartitsiviussasoq Siumumiit nalilerparput, taamaattumillu akiliuteqartitseriaatsimut periarfissat misissuiffigineqaqqullugit aalajangiiffigisassatut siunnersuut tamakkiisumik taparserparput.

Siumumi isumaqarpugut ineqarnermut tapiissutaasartut naapertuunnersut siunnersuuteqartup misissueqqusilluni Naalakkersuisut peqquneqarnissaannik siunnersuutaa akileraartarnermi isumaginninnermilu iluarsartuusseqqinnernut misissueqqissaarnernut ilaatinneqassasut, taamaattumillu Naalakkersuisunit siunnersuut soqutiginaateqartorujussuuartut aammalu sulianut aallartisarneqartunut ilaatillugu suleqataaffiginiarmassuk naammagisimaarparput.

Siumumiit siunnersuuteqartoq isumaqatigaarputtaaq oqarmat illut ukiuni amerlasuuni najorneqartut pisoqaliartornerminni naleqqukkunnaariartoraluarlutik akitsoriartortutut inis-sikkiartortarnerat. Tamannalu pissakinnerusunut annertuutigit nanertuutaasarmat Naalakkersuisut misissuisoqareernerani ukiumi missingersuussiorfiusumi 2015-mut attartornermut akiliutit aalajangersarneqarnerinut atatillugu eqqumaffigimassuk Siumumiit maluginiarparput.

Siumumiit taamatut oqaaseqarluta Inatsisartunut ilaasortap Kristian Jeremiassenip aalajangiiffigisassatut siunnersuutaa tamakkiisumik taperserparput, suliarlu Sanaartornermut Ataatsimiititaliamut suliareqqitassangornissaa inassutigalutigu.